

Nzryr-krbz Pol Mz Lr Kolosia **Natq Ngr Nzaplxtqngr Mz** **Nzryr-krbz Pol Mz Lr Kolosia**

Kxmule-esz' trkrlzkapzle Kolosia, a' Pol yrbzle letz lc mz dzbe lrmakxtr mz taon lcde, badr dzbe lrmakxtr mz taon kc Laodisea, mz provins kc Esia. Taon kc etu Efiszsz yc kz mz provins lcde. Mzli ka mrlcde nzrpipebz kandre kc Trki. Yrle letz lc mz nzwrde kc kai tqmnc-ngrde mz presin mrkc Rom. ☆ Yrle mz mzlr yiz 60—62 AD mz nibr nzrmcngngr mz Jiszsz. Mzli lc yr-kzpzle letz mz Filimon, lr Efiszsz, x lr Filipae. Letz lcng amrlx dzbede esz' kx nzyrng mz presin.

Pol yrbzle letz lc mz nzatubqti-krde kzdung nzalvztr-rbr-ngrng, kx nzrpilr kx na-ale-zvzlr da kxkqlu mz nzmnc-tr-zpwx-krbzlr mz Gct. X nzakaputr-zvzmlr zbq kxtrng, nzangio-zvzlr en-jrl, x nzvz-nqblq-zvzlr Lou sc Mosis mz dakxnzng kx trtakitrdeu nzmung. X mou nzrlrpx-lzbq-ngrbzlr mz nzpakrngr x mz nzaetqngr drtqdr murde mz drtwrdr ngi nzayrplapxngngr kxtr. X suti drtwrdr nzrkrlzngngr nzyrplapxngngr kx yc-kapq. A' nzaokrdr drtwrdr lcng amrlx nzvz-rbrng.

Mrkcng Mz Letz Lc

Kraes myaszpx-zlwzle da amrlx kcng tqmatq mz drtwr lr Kolosia. *[dckrlzde 1]*
 Kraes myalz-esz'ngr. *[1:15-20]*

☆ : Aposol 28:30-31

Pol rpibzle badr kx bzkq nzesabrting mz
nzalvztr-rbr-ngrng. [*dckrlzde 2*]

Da kcng tzmyapxbzng mz nzvz-nqblq-krdr
Kraes. [*3:1—4:6*]

Pol ayrkrpxle letz lc mz natq ngr nzarlr-
lzbqngr. [*4:7-18*]

¹ Ninge Pol kc tqmcpX Gct mz nzngini-krnge
aposal ne Jiszs KxnzmcpX, nigr ncdr mzlegu
Timoti.

² RyrbzkR bamu nimu leplz kxnztrng ne Kraes,
kx nzmncng mztea Kolosia. Nimu mzlegrng
murde vz zvz mz nzlxngiti-krmu nide.

X krka'-ngrgr kx Gct Trtegu naokatrle nimu mz
zmrlz grde kxmyalz murde namnc-zpwxamu.

Nzkrka'ngr Mz Nzawingr

³ Awi-zvz-ngrbzkR nimu mz Gct Trte, mzli
kznikeng krka'-ngrgr nimu. Murde Kxetu rgu
Jiszs KxnzmcpX nide mrlxde. ⁴ Awi-ngrbzkR
nimu mz Gct murde nzxlR-krgr nzabrtr-krbzmu
drtwrmu mz Mevalu Jiszs, x nzmrlzti-krmu leplz
ne Gct amrlx. ⁵ Nzrlxngiti-krmu x nivz lrmu
lcng nzvzpxmqng mz nzobqtipX-krmu da kcng
tqaenzliamu, tzyrlq-bekang Heven. Da lcng
tqxlR-zvzamu mzli kc tzpi-ayrnr-ngrbz bamu da
angidr kc tqngi Nrpakxmrlz. ⁶ Nrpakxmrlz lc sc
tqvz zvz nZRka-krbzle da kxmrlzting mz leplz x
tresakiu nzetunepX-krde mz nrlc. Da kc tqwaib-
zle bamu, abzo mzli kc tqxlR-ayrnr-ngrnamule
x tqkrlz-angidrpe-ngrnamu zmrlz kxmyalz kc
tqka-nrbalq Gct. ⁷ EpafRAS kc tqalvztr-ngrde
nimu mz zmrlz ngr Gct kxmyalz, nide kxnzawz-
nrbalq ne Kraes mz nigr, kcng tqwz-lxblrbzkR

badr, x mrlzti-zlwzkr nide. ⁸ X pimle bagr nivz kc tqkatrpz Mqngrkxtr mz nabzmu.

⁹ Mz nzmukrde lcde, abzo mzli kc tqxlr-ngrgr nrpa ngrmu, sa tqdctipx zvz drtwrgr nimu mz nzkrka'-krgr kx Gct nakabzle bamu nzrkr-lznggr kx vzpxm mz Mqngrkxtr, murde nakrlzamu nike tqstuti drtwr Gct. ¹⁰ Murde nzmnc-krmu natakitrde Kxetu rgu, mz da lcde seleng. Nartrngzbzmu da kx abrtz-ngrde mz da amrlx, x na-aelwapx-ngrnamu nzwznggr kxmrlz kxkqlu, x nzkrz-krmu Gct naetunepx zvz. ¹¹ X krka'-kz-ngrgr kx nzetukr zmatq ngr Gct na-axplr-zlwzle nzrlxngiti-krmu, kxmule-esz' da kx prtz, a' natu-amqngi-zvzamu mz nzabrtznggr. ¹²⁻¹⁴ X na-awibzmu mz Gct Trtegu murde vzmipxpemle nigu mz nzmncz-krbzku mz zmatq ngr alwx kc tqakamrbr-ngrde da mz nabzgu, x vzmitrpele nigu mz nzmncz-krbzku mz zmatq ngr Mrlxde Kxnmrlzti mz nzngini-krde King rgu. X mz nzbzpe-krde nigu, Jiszs xpepxpele alwx rgung murde Gct naipqle nigu. X sc tqrtz-kzpz lrpzki r nztakitr-krgr nztwz-krgr da lcng tqmrlzting tzvzpxmqng mz nzaxvctr-krbzku bade. Murde alu-moule nigu mz nzapu-krgr lam kc tqtekatrle mz nyr pnrde.

Nzmyapx-esz'ngrkr Kraes

¹⁵ Jiszs Kxnmcpx aelwapx-ngrbzle mz leplz nqmq kr Gct Trtede kc trnzmcung. X mz nzngini-krde Mrlx Gct, nide kx myapxbz mz doa x da amrlx kcng tzwznggr. ¹⁶ Mz nide, dekc Gct tqwz-ngrde doa x da amrlx Heven x mz nrlc ka, da kcng tqmcku mz mzku x da kcng

trmckuu mz mzku, kx nzmncng mzlilxlr kxmule-
 esz' enjrl o drka'ng, kxnzeting, kxnzaclveng, x
 kxnzmatqng. Doa x da amrlx nzwzngur murde
 namwitr-lxblrpwz bade. ¹⁷ Doa x da amrlx nzwz-
 atengr, a' Jiszs mnc pnz kai, x da amrlx lolvz
 lxblr zmatq ngrde. ¹⁸ Lrmakxtr apule nrkrdrtg
 Kraes, x nide narde, murde nide nou nzlungr. X
 nzatulz-kaip nide mz nzbzngur, a' trpengr nzbz-
 krde. Murde Kraes namyapxbz mz doa x da
 amrlx. ☆ ¹⁹ Murde mz nzvz-nqblq-krde me
 pnz drtwr Gct, trpnzngur da kx namrbrpxm mz
 Mrlxde mz nzaotr-angidr-krde Trtede. ²⁰ Vdz-
 kzp mz drtwr Gct esz'-krde kx nayzlumimle doa
 x da amrlx mz nrlc atwrnrngr bade mz nzwzkr
 Mrlxde. Gct ao nrwz mz nzyrleo-krm mepyr ngr
 Mrlxde mz kros. X yzlumi-mople mz nide esz'-
 krde doa x da amrlx mrka mz nrlc ka x mrkc
 Heven. *

²¹ Mzli kc, mnc-rlrupwzmu mz Gct. X aelwapx-
 ngrnamu kx pxtxpx-ngrnamu nide mz nzale-
 krmu da kxtrka x nzaongr drtwr kxtrka. ²² A'
 mzli ka mz nzbzo-krm nrkrdrtg Kraes lc mz kros,
 Gct yzlumipemle nimu bade, murde nanginimu
 leplz kxnztrng, kxnztubqng, kx nabzdr lq mz
 nzobq-krde. ²³ Da lcngr nangidati nzmu navz
 zvz nzabrtr-krbzmu drtwrmu mz Nrpakxmrlz, x
 tu-amqngiamu, bzkq nelzmu bao mz nzobqtipx-
 krmu da kc tqpi Gct mz Nrpakxmrlz. X wztrpo
 mz nzyapwxtipx-krnge Nrpakxmrlz lc mz mztea
 amrlx.

☆ **1:18** Aposol 26:23; Rom 8:29; 1 Korint 15:20; Hibru 1:6 * **1:20**
 A' sa na-ayrplapxle drka' x kxtrnzrlxngitiung amrlx.

Nzwz-nrbalqtr-krbz Pol Mz Leplz Neng Kraes

²⁴ Kxmule-esz' mncx mz presin, a' abrtzt-xngrne nzetqtr-krbz drtqnge. Murde drtqnge naetq kz mz nzxpu-krngeng da kc tqwai Kraes, mz nzokatr-krnge nrkrdrtdc kc tqngi leplz nedeng. ²⁵ Gct mcp-xle ninge mz nzwz-nrbalqtr-krbo mz leplz ne Kraes, murde naokatr-x nimu mz nzyapwxtip-x-zpwx-krnge Nrpa ngr Kraes. ²⁶ Nrpa lc ngi dakxyc-kapq pnz. Trpipwz-leu mz nrpr ngr leplz lcng kqlu mz yiz kang kqlu, a' mzli ka aelwap-xpe-ngrbz-leng mz leplz kxnztr nedeng. ²⁷ Dakxyc-kapq pnz lc tqaelwap-x-kz-ngrpz Gct mz leplz nedeng kxtrngiulrJiu. Da zpwx lc tqmyap-x nide sele. Kraes tqmncpx-ngrmle bamu murde naobqtip-x-ngrnamu nzprtr-kz-krmu mz nzmyalz-krde. ²⁸ Mz nzm-xkrde lcde, pipxbzkr Kraes mz leplz amrlx. X mz nzyrplap-x-zpwxngr, rngidrtr-ngrbzkr leplz amrlx x alvztr-ngrgr nide, murde leplz amrlx kcng tqvzmimgr mz Gct nabr-peng mz nzmnc-krdr mz Kraes. ²⁹ Delc nabztq tqtu-ngrmle bange mz nzale-krnge nzwzngr lc, mz nzmnc-xgle-krnge mz zmatq kx xplr kx katrp Kraes mz nabznge, a' trngiu nzxplr-krnge esz'-krnge.

2

¹ Suti drtwrnge nakrlzamu kx wz-katox mz nzokatr-zvz-krnge nimu lr Kolosia, lr Laodisea, x kzdu-kzng leplz kxkqlu kcng tr-rmcti-lzbqkru badr. ² Suti zl-wz drtwrnge kx mz nzaxvctr-lxblr-krmu mz nivz, nabzmu napq x nakrlz-angidramu da amrlx kx vzpxm mz dakxyc-kapq pnz kx aelwap-xpengr Gct, krlcde Kxnmcp-x.

³ Yrlqbz Gct mz Kraes esz'-krde nzyrplapx-zlwz-krde x nzrkrlz-zlwz-krde.

⁴ Da lc napibo bamu murde ma tzesabrtlr nimu mz da kx nzaoti drtwrdr kx vz-rbr, kxmule-esz' mz nzxlr-krbzmuleng opxm kx ngi da angidr.

⁵ Murde kxmule-esz' trmncpwc'u bamu mz nrkr-drtq, a' ninge kc tqmncbo bamu mz drtwrnge. X drtwrnge elalzm mz nzxlr-krnge kx tu-amqngi-lxblramu mz nzlxngiti-krmu Kraes.

Nzlungr Angidr Mz Nzaxvctr-lzbq-ngrbz Mz Kraes

⁶ Mz nzmukrde lcde, navz zvz nzmncrkrbzmu mz Mevalu Jiszs, murde abtrpebzmu drtwrmu bade nzngini-krde Kxetu rmu.

⁷ Nabzmu namqngitprz bade, na-apule nounc kc dzbrde tqvzo mz drtc'. X nzmnc-krmu naxplr na-apule ma kc tzwzti, tqngi noude Jiszs. Tu-amqngi-zvzamu mz nzrlxngiti-krmu nrpa kc tzalvztr-ngrmu. X bzkq esaki nzawi-zvz-krbzmu mz Gct.

⁸ Aclvetio-angidramu, murde leplz ma tqpe-amqngilr nimu mz nzalvztrngr kx trokatrleu leplz x avz-rbrle nidr. Nzalvztrngr kxnmulr lcng nzaprcbz mz leplz, x vzpxm mz drka' kcng tzaclvelr nrlc ka, a' trnzvzpxpuung mz Kraes. ⁹ Murde trpnzngr da kx mrbrpxm mz nrkrdrdq Kraes mz nzaotr-angidr-krde Gct. ¹⁰ X mz nzaxvctr-lzbq-krbzmu mz Kraes, trpnzngr da kx mrbrpxm mz nzlu-krmu angidr. Murde sc tqaclvele zmatqng x kxnzung amrlx.

¹¹ Mz nzaxvctr-lzbq-krbzmu mz Kraes, zmatq ngr alwx trlolvzpeleu nimu. Murde sc tqrkatx Kraes zmatq lc mz nzrpakr-krde nabzmu. A'

trngiu nzrpakrngr ncblo kc tzale lr Jiu, a' ngi dalr nabz kc tqwzngr Kraes mz zmatq ngrde. ¹² Mzli kc tqwrkxtr-ngrnamu, nzyrtzmqimu Kraes, x nzatumilz-kzpamu Kraes, murde brti drtwrmu zmatq ngr Gct kc tqatulzle Kraes mz nzbz-krde. ¹³ Mzli lcde mnclzbzmu mz zmatq ngr alwx x mqngrmu bz. A' mzli ka Gct kapebzle nzlungr kxmrna bamu mz Kraes, x ipqpele nimu mz alwx ngrmung amrlx, da kc tqwaibzle mz kxnzrlxngiting amrlx. ¹⁴ Murde taoku mz lou scdeng mzli kc, x yrole nike alekung. Lou scdr lr Jiu, nzrpilr kx alwx lcng naxpe-mopwzku bade. A' mzli ka mz nzbzkr Jiszs, Gct katxpxle lou amrlx kcng tzpelr nigu, apule kx tqlvztrle alwx ngrgung mz kros. ¹⁵ X mz kros lcde Kraes aovxiole kxnzmncng mzlilxlr kxnztrkang, x katxpxbzle zmatq ngr drka' lcng amrlx. X amyatibzle drtqdr mz mz leplz amrlx.

¹⁶ Mz nzmu-krde lcde, bzkq rlr-ngrbzmu mz ncblo nzpi-krbzlr bamu da kx nangqnamu x namnqamu x kxnamu nzakaputr-krmamu zbq kxtr, zbq ngr temz kxpo x Sabat kx ngi zbq kxnzamati. ¹⁷ Nqm q kxnzmulr lcng ngi tx-pwz zmyo ngr Kxnzmcp x da kxmrlzting kcng natwzmlle. Murde nzaelwapx-ngrdr kx-pipz da kx na-aelwapx-zpwx-ngrde mzli kc navz-ngrmle. A' mzli ka sc tqvzpem, x mz nzaxvctr-krbzmu bade trpengr nzvz-nqblq-krmu nqm lcng mzli kc. ¹⁸ Bzkq lalztqzbmu mz leplz kx nzrpilr nzmyalzng murde nzrmwible-krdr. Nzrpilr nartulrtr-ngrbzlr bamu nz-avzozlzbq-krmu x nzangio-kz-krmu enjrl, da kc tzwailr. A' nzamatq-lzbqng, x nzvz-rbrng murde

nzvz-nqblq-tpwzlr nzaokrdr drtwrdr kxtrka.
 19 Leplz kxnmulr lcng trnzmnclzpwzung mz
 zmatq ngr Kraes, mz nznngini-krde nar nrkrdrdq,
 kc tqngi leplz nedeng. X nrkrdrdq sc tqmnc-xglele
 nide murde naokatr-lzbqku x nrkrdrdqde naxplr.
 X Gct dekc tqaetunepxle nrkrdrdq lc.

Nzbzngr X Nzlungr Mz Kraes

20-22 Axvctr-lzbqamu mz nzbzkr Kraes murde
 ma tqmnc-nqblqamu nqm q ngr drtwr lr nrlc
 ka. ?A' nike tqvz-nqblqbe-ngrnamu natqdrng
 x nzalvztr-krdrng? Murde nzrpilr kx, "Bzkq
 maleamu." "Bzkq ngqamu." "Bzkq bxtamu."
 A' lou lcng amrlx nzymnetr-ngrdr da kcng
 nayrkrpxng. 23 Mz drtwr leplz lou lcng nzrkabzlr
 badr nzyrplapxng. X nzlolvzo-lzbqng mz nzvz-
 nqblq-krdr lou lcng kx nzrtulrtr-ngrbzng badr
 nzaetqtingr nrkrdrdqdr. Kxmule-esz' mrlz mz
 nzobq-krdr, a' trnzokatrlru nidr mz nzyrlqpx-
 lzbq-krdr mz alwx kcng tqmrlz bz badr.

3

1 Na-aoti drtwrmu dalr Heven, mrkc tqmatq-
 esz'ngr tqwxbungr Kraes mz nrlar Gct kxrtc, ✧
 murde nzaxvctrpebzmu mz Kraes mz nzatulz-
 mou-krm Gct nide mz nzbzngr. 2 Na-aoti-zvzpwz
 drtwrmu dalr Heven, a' bzkq aoti drtwrmu
 dalr nrlc ka. 3 Murde apuamu kxnbzpeng
 mz nzaxvctr-krbzmu mz nzbzkr Kraes. X sc
 tqaovxiopcle zmatq ngr alwx. Mz nzmu-krde
 lcde, nzlu-krmu angidr trnzaelwapxkangr. A' sc
 tqyc-kapqtrbepz mz Kraes kc tzmncng ncdr Gct.

✧ 3:1 Sam 110:1

⁴ Kraes nide nou nzlu-krmu lc angidr. X mzli kc nayzlu-ngrmle, da kx yc-kapq naopx. X sa na-aelwapx-ngrde zmatq ngrde mz nrlc tulvzo. X na-aelwapx-kz-ngrde kx nimu leplz nedeng.

Nzlungr Mzli Kc X Nzlungr Mzli Ka

⁵ Mz nzmu-krde lcde, bzkq aoti drtwrmu nqm q ngr alwx kcng tzvz-nqblqlr mrka mz nrlc. A' yrllqpx-lzbqamu mz nzrmwimingr leplz kx trngiu krnalzmu, nzalengr da kx myangr drtqmu, x nzaongr drtwrmu x nzsutikr drtwrmu kxtrka. X bzkq prlvz mzpu da, murde mz nzprlvzkr mzpu da, angioamu da myaszpxle Gct, kc tqtakitxtrpwzle nzangiongr nide. ⁶ X sa nayrplapxle leplz amrlx kcng tzalelr da kxnmulr lcng. ⁷ Mzli lcng tqvztxpe, mnc-nqblqamu alwx lcng, x alwx lcng tqtrka tzmailzlr nimu.

⁸ A' mzli ka da kx bzkq rtrngztipebzm nidr seleng: zngya, nzotangr, x nzaetqngr drtq. Bzkq rpibqtiamu x bzkq natq kxtrka vzpxm mz naomu. ⁹ Bzkq pokiapebzm mz leplz, murde sc tqyrlqtxopeamu alwx lcng, ¹⁰ x tekqtr-alzupreamu mz nzlungr kxmrna. X mz nzlungr lc tqmrna ablepxngr Gct nimu murde nqm q nr nabzmu na-apule nide x nakrlz-angidramu nide. ¹¹ Mz nzlungr lc tqmrna, tqwzng Gct, trakipxleu leplz kxtrngiulrJiu x lr Jiu, x ncblo kcng trnzpakru x krkcng tzipakrng, lr mrkzbleng, leplz ngr nqvi kzbleng, kxnzawz-nrbalqng x kxtrnzawz-nrbalqung. Leplz lcng trnzblepxung amrlx ngrdr, murde Kraes esz'-krde myaszlzle nidr amrlx x mncpxm mz krkcng amrlx tzbtri

drtwrdr nide. Mz nzmukrde lcde, leplz amrlx nzsakrlrng mz nzobqkrde.

¹² Nimu leplz kxnztrng ne Gct kx mcpxpeleng x mrlzti-zlwzle nimu. Nayc mz drtwrmu leplz. X namncamu mz nzokatrngr, nzavzozlbqngr, nzmnc-nrwxngr x nzaenzli-zpwxngr.

¹³ Drtwrmu bzkq ngya ani, a' ipq-lzbqamu. Nzmu kzdq nimu kx aetqtibzle drtq kztede, naipq-lzbqng da kc tqwai Kxetu rgu nzipqkrde nigu. ¹⁴ X da kx myapxbz mz da lcng, namncamu mz nivz lrde kc tqlovlztr-lxblrle da lcng amrlx mz nzesz'tingr.

¹⁵ Nzmnc-zpwxngr kc tqkabz Kraes bamu, na-aclevele nabzmu. Murde Gct mcpxpele nimu mz nzmnc-tr-lxblr-knamu mz nrwx mz nzngini-krmu dzbede kxesz'. X nawi-zlwz-ngrbzmu bade.

¹⁶ Natq Kraes nangi da kx ayrnrngr zvz mz nabzmu, mz nzalvztr-lzbqkrmu x nzlc-apqzbz-lzbqkrmu, mz nzyrplapxng kx kabz Gct, x mz nawi-krbzmu bade mz nzngirkmung him, Sam x nabz kxnztrng. ¹⁷ Da amrlx kcng tqaleamu x tqpiamu, nartrngztibzmu mz nzngini-krmu leplz neng Kxetu rgu Jiszs. X nawi-ngrbzmu mz Trtegu Gct da kxmrlzting amrlx kcng tzvzpxmqng mz nzaxvctr-krbzmu bade.

Nzyokaetipxng Nzlungr Kxmrna

¹⁸ Nimu olvz kx nzyrlzng, namnc-lzbzmu mz ncblo ngrmung mz nzngini-krmu olvz kx nzlxn-gitilr Jiszs. ¹⁹ Nimu ncblo kx nzyrlzng namrlzti-zvzamu olvz nalzmung. Namnc-nrwx-zvzamu x bzkq ngyati drtwrmu x tabramu nidr. ²⁰ Nimu doa, vz-nqblq-zvzbzmu natq trtemu x lxemu, murde da kx abrtz-zlwzng Gct delc. ²¹ Nimu

trteng x lxeng doa, bzkq xplrbqtiamu doa nemung, murde nabzdr ma tqbao mz nzmnc-knamu badr. ²² Nimu kxnzawz-nrbalqng navz-nqblq-zvzamu natq kxnzetu rmung mz da amrlx. A' bzkq ale-txpwzmu mzli kc tzmnc-ngrbzlz, murde narpibzlz kx wz-angidramu. A' nawztr-zvzbzmu badr da kc tqwaibzmu mz Kxetu rgu Jiszs. ²³ Nzwz-nrbalqngr kcng nartrngzibzmu navzdz-angidrm mz nabzmu, x nzwz-krmu na-apule kx wztrpzmu mz Kxetu rgu, a' trngiu mz ncblo. ²⁴ Murde krlzpeamu kx Jiszs sa nakabzle bamu da kcng tqyrlq-bekale mz nzka-krbze mz leplz nedeng. Kraes nide angidr Kxetu kc tqwztrpzmu bade. ²⁵ X Gct sa na-ayrplapxle leplz amrlx kcng tzalelr da kxtrka. Murde trkxneu mz drtqde kx leplz nzngini-krdr kxnzetzung o ncblo txneng, a' nzayzlu-krbze da badr vz-nqblq-zvzle da kx nzrtrngztibzlrng.

4

¹ Nimu kxnzetzung, mz nzmailz-krmu leplz, kabzmu nike mrlz x tubq mz kxnzawz-nrbalq nemung. Murde mnclz-kzpzmu mz kzdq Kxetu. Nide kc tqmnc Heven x tqobq-ngalelvzle nimu.

Nzalvztrngr

² Nakrka'-zvzbzmu mz Gct, x mzpu nabr-zvzpwz mz nzkrka'-krmu x na-awibzmu bade. ³ X krka'-kz-ngrbzm nigr mz Gct, murde nakamle bagr mzli r nzpipx-krgr nrpa kx Kraes na-arlapx-kzle kxtrngiulrJiu, murde tqmncpx-ngrmc mz presin, mz nzyapwxtipx-krnge nrpa lc tqyc-kapq pnz. ⁴ Krka'-ngrnamu ninge, murde

natq ngr nzyokaetipx-krnge nrpa lc naopxng, mz nzvz-nqblq-krde me pnz drtwr Gct.

⁵ Narmu nayrplapx mz nzmnc-krmu badr leplz kxtrnzlxngitikalr Kraes, murde nakrlzamu mzli kxmrlz nzpipx-krbzmu Nrpakxmrlz badr. ⁶ X mz nzryapwx-krbzmu lc badr, narpi-zvzamu natq kxmrlz mz nzxlrngr x otrngr drtwr. X na-ayzlu-ngrbzmu natqdr mz natq kxtubq.

Natq Ngr Nzarlz-lzbqngr

⁷ Nrpa rnge sa napi-krlzpwz mzlegu Tikikzs kc tqmrlzti-zlwzx. Wz angidr mz nzwztr-lxblz-krgr ncdr mz nzwztr-krbzkr mz Jiszs. ⁸ Atwzlr-ngrbole bamu, murde nayapwxtibzle bamu kxmu nzmnc-krgr x na-apqtrpzle nabzmu. ⁹ X atwzlr-kz-ngrbo lr mrnyzmu Onesimzs navz-kzpzng ncdr. Nide mzlegu kx mrlzti-zlwz-kzkr x wz angidr. Mrlx lcng nzling, sa napi-krlzpwzlr da amrlx kcng tqprtztng mrka.

¹⁰ Aristakzs kc tqmnckr ncdr mz presin x Mak kc tqngi kave kr Banabas, nzrpibzlr bamu kx, "Nimu la." Mak lc tqyrpe-kaipo bamu kx nzmu kx tqkrlzbzle nimu elalvzamu nide. ¹¹ X Josua kc tqngi kz drtqde Jastzs, rpi-kzpzle bamu kx, "Nimu la." Mz ncblo kcng tqwzkr badr mrka mz nzaesotr-krbzlr leplz mz Gct mz nzngini-krde King rdr, Aristakzs, Mak, x Josua, kx nzngini-tpwzdr lr Jiu, x nzapqtr-zlwzmlr drtwrnge.

¹² Epafras rpi-kzpzle bamu kx, "Nimu la." Nizkde doa lr Kolosia kx wztrpz mz Jiszs Kxnm-cpx. X nabzde pq mz nzkrka'-zvz-krde, nimu kx natu-amqngiamu mz nzvz-nqblq-krmu me pnz drtwr Gct, murde nzmnc-krmu mz Kraes

nabr x na-abrtr-zvzbzmu drtwrmu bade. ¹³ Mc-angidrx mz mzke' nzwz-kato-krde mz nzkrka'ngr mz nzokatr-krde nimu lr Kolosia, lr Laodisea, x lr Haerapolis. ¹⁴ Dckta Luk kc tqmrlzti-zlwzkr, nidr ncdr Demas nzrpi-kzpzlr kx, "Nimu la."

¹⁵ Pibzmu mz mzlegung kcng tzmncng Laodisea x olvz kc tqngi drtqde Nimfz ncdr leplz ne Kraes kcng tzyrlwr-lxblr-zvzng ma nyzde, kx rpibzkr badr kx, "Nimu la." ¹⁶ Mz nibr nzrlwx-krmu letz lc, atwzlr-kz-ngrbzmu mz mzlegung kcng Laodisea mz nzrlwx-kz-krdrle. X krkc tqyrbo badr na-atwzlr-alzu-ngrpwzlr bamu murde narlwx-kzamu. *

¹⁷ X napibzmu mz Akipzs kx pibo bade kx, "Atutr zpwx nzwzngnr kc tzkabz bam mz nzwztr-krbzme mz Kxetu."

¹⁸ Yr-angidrx mz mqnge, "*Ninge Pol rpibo bamu kx, 'Nimu la.'*" Bzkq mrbrtr mz drtwrmu nzkrka'-krmu ninge mz nzmnc-krnge mz presin mrka Rom. Krka'-ngrne kx zmrlz ngr Gct kxmyalz naycbz bamu.

Delape. *Ninge Pol.*

* **4:16** Mwx nangi nzryr-krbz Pol mr lr Efszsz.

**Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 21 Feb 2024 from source files dated 31 Aug 2023

fb2b7f06-e254-5fb7-b59d-ee21d5d7a93f